

Veterum
Philoso-
phorum
hac de re
placita re-
feruntur.

Non desunt certe tam ex veteribus quam recentio-
ribus, qui hanc ex Astris circa humanam vitam prædican-
di facultatem, pro superstitione quadam & damnabili cu-
riositate reputant, quæ plebejorum magis ingeniis, quam
sapientiorum ingeniorum cultura conveniat. Unde licet
antiquitus ab Ægyptiis & Chaldæis philosophis multum
huic scientiæ fuerit attributum, qui eandem à Patriarchis
accepisse se referunt, & maxime *Vaticinium Jacobi* de fu-
turis stemmatum fati, *Genes. cap. 49.* ad prædictiones
tales Astrologicas recensent, quod tamen merito impro-
bamus, *Propheticam* hanc, non *Astrologicam* prænunciatio-
nem reputantes. Tamen postea vel ob depravationem do-
ctrinæ Astrologicæ, vel ex aliis causis politicis ab illa o-
pinione recesserunt, & hanc divinandi scientiam tam Græ-
ci quam Latini deinde Philosophi multum reprobarunt.
Conf. Ant. van Dale *Diss. de origin. & progress. Idolol. & Su-
perst. Diss. III. cap. 2.* Et inprimis *Favorini* Philosophi oratio
apud Gellium *lib. XIV. Noct. Att. cap. I.* huc pertinet, ubi
contra hanc Astrologicam scientiam vehementer disputat.
Atque etiam *Socrates* hanc divinationis curam improbat,
uti refert *Xenophon* in *lib. de dict. Socrat.* quod recenset
Eusebius de preparat. Evāng. cap. 4. ibi: *Socratem* dicere
solicum cognitionem futurarum rerum, quæ in Dei pote-
state sunt, non esse hominibus procurandam; neque e-
nim posse homines, eas res cognoscere, nec Deo gratum
esse, si, quæ ille occultavit, ea mortales velint nimis stu-
diose curioseque rimari. Gravissime porro in tales Astro-
logos invehitur *Cicero* de *divinat. L. II. c. 42.* ibi: *Cum tem-
pore anni tempestatumque cæli conversiones commutationesque tan-
te stant accessu stellarum & recessu, cumque ea vi Solis efficiantur,
quæ videmus, non verisimile solum, sed etiam verum esse censent, pe-
rinde, utcunque temperatus sit Æther, ita pueros orientes animari
atque formari ex eo ingenia, mores, animum, corpus, actionem
vitæ casus cujusque eventusque fingi; O delirationem incredibilem,*